

("Službeni glasnik Bosne i Hercegovine", br. 53/06)

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine, na 79. sjednici Predstavničkog doma, održanoj 18. maja 2006. godine, i na 58. sjednici Doma naroda, održanoj 23. maja 2006. godine, usvojila je

ZAKON O IZMJENAMA I DOPUNAMA KRIVIČNOG ZAKONA BOSNE I HERCEGOVINE

Član 1.

U Krivičnom zakonu Bosne i Hercegovine ("Službeni glasnik BiH", br. 37/03, 54/04, 61/04 i 30/05), u članu 1. iza stava (7) dodaju se novi st. (8) i (9) koji glase:

"(8) *Vojno lice*, u smislu ovog zakona, je profesionalni vojnik, kadet u vojnoj školi i pripadnik rezervnog sastava iz Zakona o službi u Oružanim snagama Bosne i Hercegovine, kao i državni službenik i zaposlenik na službi u Oružanim snagama Bosne i Hercegovine i državni službenik i zaposlenik koji vrši službenu dužnost u lancu komandovanja i nadzora nad Oružanim snagama Bosne i Hercegovine, uključujući zamjenike ministra odbrane.

(9) Kada je službeno lice označeno kao lice protiv kojeg je učinjeno krivično djelo, službeno lice, u smislu ovog zakona, je, osim lica definiranih u stavu (3) ovog člana, i vojno lice iz stava (8) ovog člana."

Dosadašnji st. (8) do (19) postaju st. (10) do (21).

Dosadašnji st. (20) i (21) brišu se.

Stav (22) mijenja se i glasi:

"(22) *Tajni podatak* je činjenica ili sredstvo koje sadrži informaciju iz oblasti javne sigurnosti, odbrane, vanjskih poslova i interesa, obavještajne i sigurnosne djelatnosti ili interesa Bosne i Hercegovine, komunikacionih i drugih sistema važnih za državne interese, pravosuđe, projekte i planove značajne za odbrambenu i obavještajno-sigurnosnu djelatnost, naučnih, istraživačkih, tehnoloških, privrednih i finansijskih poslova od važnosti za sigurnost i funkcioniranje institucija Bosne i Hercegovine, odnosno sigurnosnih struktura na svim nivoima državne organizacije Bosne i Hercegovine, a koje je određeno kao tajno zakonom, drugim propisom ili općim aktom nadležnog organa donesenim na osnovu zakona ili koje je određeno kao tajni podatak u skladu s odredbama zakona i propisa o zaštiti tajnih podataka. Ovaj pojam također uključuje i tajni podatak druge države, međunarodne ili regionalne organizacije."

Iza stava (30) dodaje se novi stav (31) koji glasi:

"(31) *Oružje i vojna oprema* su pozicije navedene u najnovijoj "zajedničkoj listi vojne opreme" iz zakona o proizvodnji, uvozu i izvozu oružja i vojne opreme."

Dosadašnji st. (31) i (32) postaju st. (32) i (33).

Član 2.

Iza člana 162. (*Oružana pobuna*) dodaje se novi član 162 a. koji glasi:

"Protuzakonito formiranje vojnih snaga

Član 162.a

(1) Ko protivno Zakonu o odbrani Bosne i Hercegovine ili Zakonu o službi u Oružanim snagama Bosne i Hercegovine organizira, obučava, oprema ili mobilizira vojnu snagu na teritoriji Bosne i Hercegovine, kaznit će se kaznom zatvora najmanje pet godina.

(2) Kaznom iz stava (1) ovog člana kaznit će se ko bilo kako rukovodi činjenjem krivičnog djela iz stava (1) ovog člana.

(3) Ko se na bilo koji način pridruži vojnoj snazi organiziranoj, obučenoj, opremljenoj ili mobiliziranoj protivno Zakonu o odbrani Bosne i Hercegovine ili Zakonu o službi u Oružanim snagama Bosne i Hercegovine, kaznit će se kaznom zatvora najmanje tri godine.

(4) Ko nabavlja sredstva za činjenje krivičnog djela iz stava (1) ovog člana, kaznit će se kaznom zatvora od jedne do deset godina."

Član 3.

U članu 163. (*Špijunaža*) u st. (1) i (4) riječi: "državna, vojna ili službena tajna" u različitim padežima zamjenjuju se riječima: "tajni podaci" u odgovarajućim padežima.

U člana 163. stavu (5) iza riječi: "iz stava (1)" dodaju se riječi "i (2)".

Član 4.

Naslov člana 164. (*Odavanje državne tajne*) mijenja se i glasi: "Odavanje tajnih podataka".

Član 164. mijenja se i glasi:

"(1) Službeno ili odgovorno lice u institucijama Bosne i Hercegovine ili vojno lice, koje je ovlašteno za određivanje tajnosti podataka ili za pristup tajnim podacima a koje bez ovlaštenja drugome saopći, preda ili na drugi način učini dostupnim tajni podatak, ili pribavi tajni podatak s ciljem da ga saopći ili preda neovlaštenom licu, kaznit će se kaznom zatvora od šest mjeseci do pet godina.

(2) Kaznom iz stava (1) ovog člana kaznit će se ko, s ciljem da ga neovlašteno upotrijebi, protupravno pribavi tajni podatak ili ko drugome saopći, preda ili na drugi način učini dostupnim tajni podatak bez dozvole, kao i ko drugome saopći, preda ili na drugi način učini dostupnim ili posreduje u saopćavanju, predaji ili na drugi način drugome učini dostupnim činjenice ili sredstva koje sadrže informaciju i za koje zna da su tajni podatak a u čiji je posjed došao protupravno.

(3) Kaznom zatvora od jedne do deset godina kaznit će se ko počini krivično djelo iz st. (1) i (2) ovog člana:

- a) iz koristoljublja; ili
- b) u pogledu podatka koji je u skladu sa zakonom označen kao "strogo povjerljivo" ili stepenom "tajno" ili kao "državna tajna" ili stepenom "vrlo tajno"; ili
- c) radi saopćavanja, predaje ili na drugi način činjenja dostupnim tajnog podatka ili njegove upotrebe izvan Bosne i Hercegovine.

(4) Ako je krivično djelo iz st. (1) i (3) ovog člana počinilo lice koje, po Zakonu o zaštiti tajnih podataka, ima zakonsko ovlaštenje za određivanje tajnosti podatka ili za pristup tajnim podacima onog stepena u pogledu kojeg je počinjeno krivično djelo, počinitelj će se kazniti:

- a) za krivično djelo iz stava (1) ovog člana, kaznom zatvora najmanje tri godine;
- b) za krivično djelo iz stava (3) ovog člana, kaznom zatvora najmanje pet godina.

(5) Ako je krivično djelo iz st. (1), (2) i (3) ovog člana počinjeno za vrijeme ratnog stanja ili neposredne ratne opasnosti ili vanrednog stanja ili kada je izdata naredba za angažiranje i upotrebu Oružanih snaga Bosne i Hercegovine, počinitelj će se kazniti kaznom zatvora najmanje pet godina.

(6) Ako je krivično djelo iz st. (1) i (4) ovog člana počinjeno iz nehata, počinitelj će se kazniti:

- a) za krivično djelo iz stava (1) ovog člana, novčanom kaznom ili kaznom zatvora najmanje tri godine;
- b) za krivično djelo iz stava (4) ovog člana, kaznom zatvora od tri mjeseca do tri godine.

(7) Ako je krivično djelo iz stava (6) ovog člana počinjeno u pogledu podatka koji je u skladu sa zakonom označen kao "strogo povjerljivo" ili stepenom "tajno" ili kao "državna tajna" ili stepenom "vrlo tajno", počinitelj će se kazniti kaznom zatvora od šest mjeseci do pet godina.

(8) Odredbe st. (1), (3), (4), (5), (6) i (7) ovog člana primjenjuju se i na lice koje bez ovlaštenja drugome saopći, preda ili učini tajne podatke dostupnim nakon što mu je prestala dužnost službenog ili odgovornog lica u institucijama Bosne i Hercegovine ili vojnog lica ili lica ovlaštenog za određivanje tajnosti podatka ili za pristup tajnim podacima.

(9) Nema krivičnog djela odavanja tajnih podataka ako neko objavi ili posreduje u objavljivanju tajnih podataka čiji je sadržaj suprotan ustavnom poretku Bosne i Hercegovine, s ciljem da javnosti otkrije nepravilnosti vezane uz organiziranje, djelovanje ili vođenje službe ili s ciljem da javnosti otkrije činjenice koje predstavljaju povredu ustavnog poretka ili međunarodnog ugovora, ako objavljivanje nema ozbiljne štetne posljedice za Bosnu i Hercegovinu."

Član 5.

Član 225. (*Odavanje službene tajne*) briše se.

Član 6.

U članu 237. (*Povreda tajnosti postupka*), st. (1) i (2) riječi: "ono što je saznao u sudskom, prekršajnom ili u upravnom postupku" zamjenjuju se riječima: "činjenicu ili sredstvo koje sadrži informaciju i u čiji je posjed došao iz istražnog, sudskog, prekršajnog ili upravnog postupka", riječi: "drugog nadležnog organa ili institucije Bosne i Hercegovine" zamjenjuju se riječima: "od strane ovlaštenog lica", a riječi: "proglašeno kao tajna" zamjenjuju se riječima: "označeno kao tajni podatak".

Član 7.

U članu 240. (*Otkrivanje identiteta zaštićenog svjedoka*), stavu (1) riječi: "drugog nadležnog organa ili institucije Bosne i Hercegovine" zamjenjuju se riječima: "od strane ovlaštenog lica", a riječ "tajnima" zamjenjuje se riječima: "tajnim podacima".

Član 8.

Iza člana 246. (*Nedozvoljena distribucija satelitskog signala*) dodaje se Glava XXI A i članovi 246 a., 246 b., 246 c., 246 d., 246 e., 246 f., 246 g., 246 h., 246 i., 246 j., 246 k., 246 l., 246 m., 246 n., 246 o., 246 p., 246 r., 246 s., 246 t., 246 u., 246 v., 246 z., 246 q., 246 x., 246 y., 246 w., i 246 ww. koji glase:

"XXI A - GLAVA DVADESET I PRVA

KRIVIČNA DJELA PROTIV ORUŽANIH SNAGA BOSNE I HERCEGOVINE

Neizvršenje i odbijanje izvršenja naređenja

Član 246 a.

- (1) Vojno lice koje ne izvrši ili odbije izvršiti naređenje nadređenog u vezi sa službom, pa zbog toga nastupi nemogućnost vršenja ili otežano obavljanje službe ili opasnost po život ljudi ili imovinu velike vrijednosti, kaznit će se kaznom zatvora do pet godina.
- (2) Vojno lice koje se protivi stražaru, patroli, službenom ili drugom vojnom licu u sličnoj službi dok obavljaju svoju dužnost, kao i vojno lice koje ne posluša njihov poziv ili ne izvrši ili odbije izvršiti njihovo naređenje, kaznit će se novčanom kaznom ili kaznom zatvora do jedne godine.
- (3) Ako su krivičnim djelom iz st. (1) i (2) ovog člana prouzrokovane izrazito teške posljedice za vojnu službu, počinitelj će se kazniti kaznom zatvora od dvije do osam godina.
- (4) Vojno lice koje počini krivično djelo iz stava (1) ovog člana iz nehata, kaznit će se novčanom kaznom ili kaznom zatvora do jedne godine.
- (5) Počinitelj krivičnog djela iz st. (1), (2) i (4) ovog člana koji je bio izazvan protuzakornim ili nepravilnim postupanjem nadređenog, stražara, patrole, službenog ili drugog vojnog lica, može se blaže kazniti ili osloboditi kazne.

Odbijanje primanja i upotrebe oružja

Član 246 b.

Vojno lice koje protivno propisima i bez opravdanog razloga odbije primiti oružje ili ga upotrijebiti po naređenju ili po pravilima službe, kaznit će se kaznom zatvora od jedne do pet godina.

Protivljenje nadređenom

Član 246 c.

- (1) Vojno lice koje zajedno s drugim vojnim licima pruži otpor naređenju nadređenog datom u vezi sa službom ili odbije izvršiti naređenje ili odbije izvršiti svoju dužnost, kaznit će se kaznom zatvora od tri mjeseca do pet godina.
- (2) Ako je krivično djelo iz stava (1) ovog člana počinjeno na organiziran način, počinitelj će se kazniti kaznom zatvora od dvije do osam godina.
- (3) Vojno lice koje pri počinjenju krivičnog djela iz st. (1) i (2) ovog člana upotrijebi oružje, kaznit će se kaznom zatvora najmanje tri godine.
- (4) Ko organizira ili bilo kako rukovodi počinjenjem krivičnog djela iz st. (1), (2) i (3) ovog člana, kaznit će se kaznom zatvora najmanje deset godina.
- (5) Vojni starješina koji učestvuje u počinjenju krivičnog djela iz st. (1), (2) i (3) ovog člana, kaznit će se kaznom zatvora najmanje deset godina.
- (6) Vojno lice koje pri počinjenju krivičnog djela iz stava (3) ovog člana usmrti neko lice iz nehata, kaznit će se kaznom zatvora najmanje tri godine.
- (7) Vojno lice koje pri počinjenju krivičnog djela iz stava (3) ovog člana usmrti neko lice s namjerom, kaznit će se kaznom zatvora najmanje deset godina ili kaznom dugotrajnog zatvora.
- (8) Počinitelj krivičnog djela iz stava (1) ovog člana koji je bio izazvan protuzakornim ili nepravilnim postupanjem nadređenog, može se blaže kazniti ili osloboditi kazne.

Povreda stražarske, čuvarske, patrolne ili druge slične službe

Član 246 d.

- (1) Vojno lice koje postupi protivno propisima o stražarskoj, čuvarskoj, patrolnoj ili drugoj sličnoj službi, i time prouzrokuje teške posljedice za službu ili službu teško ugrozi, kaznit će se kaznom zatvora do tri godine.
- (2) Vojno lice koje počini krivično djelo iz stava (1) ovog člana blizu skladišta oružja ili vojne opreme ili skladišta eksplozivnog materijala ili blizu drugog važnog objekta, kaznit će se kaznom zatvora od tri mjeseca do tri godine.
- (3) Ako je krivičnim djelom iz st. (1) i (2) ovog člana neko lice teško tjelesno povrijeđeno ili je prouzrokovana imovinska šteta velikih razmjera ili su nastupile druge teške posljedice, počinitelj će se kazniti kaznom zatvora od šest mjeseci do pet godina.
- (4) Ako je krivičnim djelom iz st. (1) i (2) ovog člana neko lice usmrćeno, počinitelj će se kazniti kaznom zatvora od jedne do deset godina.
- (5) Vojno lice koje počini krivično djelo iz st. (1) do (4) ovog člana iz nehata, kaznit će se:
 - a) za krivično djelo iz stava (1) ovog člana, kaznom zatvora do šest mjeseci;
 - b) za krivično djelo iz stava (2) ovog člana, kaznom zatvora do jedne godine;
 - c) za krivično djelo iz stava (3) ovog člana, kaznom zatvora do tri godine;
 - d) za krivično djelo iz stava (4) ovog člana, kaznom zatvora do pet godina.
- (6) Ako je krivičnim djelom iz stava (5) ovog člana prouzrokovana posljedica iz st. (3) ili (4) ovog člana, počinitelj će se kazniti kaznom zatvora od tri mjeseca do pet godina.

Prinuda prema vojnom licu u obavljanju službene dužnosti

Član 246 e.

- (1) Ko silom ili prijetnjom da će neposredno upotrijebiti silu spriječiti vojno lice u obavljanju službene dužnosti ili ga na isti način prisili na obavljanje službene dužnosti, kaznit će se kaznom zatvora do tri godine.
- (2) Ko pri činjenju krivičnog djela iz stava (1) ovog člana vojno lice teško uvrijedi ili ga lako tjelesno povrijedi, kaznit će se kaznom zatvora od tri mjeseca do tri godine.
- (3) Ko pri činjenju krivičnog djela iz st. (1) i (2) ovog člana upotrijebi oružje, kaznit će se kaznom zatvora od šest mjeseci do pet godina.
- (4) Počinitelj krivičnog djela iz stava (1) ovog člana koji je bio izazvan protuzakonom ili nepravilnim postupanjem vojnog lica, može se blaže kazniti ili osloboditi kazne.

Napad na vojno lice u obavljanju službe

Član 246 f.

- (1) Ko napadne ili ozbiljno prijeti da će napasti vojno lice dok vojno lice obavlja službenu dužnost, kaznit će se kaznom zatvora do tri godine.
- (2) Ako je krivičnim djelom iz stava (1) ovog člana vojno lice lako tjelesno povrijeđeno, ili je krivično djelo iz stava (1) ovog člana počinjeno upotrebom oružja, počinitelj će se kazniti kaznom zatvora od tri

mjeseca do tri godine.

(3) Ako je krivičnim djelom iz stava (1) ovog člana vojno lice teško tjelesno povrijeđeno, ili su prouzrokovane teške posljedice za službu, počinitelj će se kazniti kaznom zatvora od jedne do deset godina.

(4) Ako je pri počinjenju krivičnog djela iz stava (1) ovog člana vojno lice s namjerom usmrćeno, počinitelj će se kazniti kaznom zatvora najmanje deset godina ili kaznom dugotrajnog zatvora.

(5) Počinitelj krivičnog djela iz st. (1) i (2) ovog člana koji je bio izazvan protuzakonitim ili nepravilnim postupanjem vojnog lica, može se blaže kazniti ili osloboditi kazne.

Zlostavljanje podređenog ili mlađeg

Član 246 g.

(1) Vojni starješina koji u službi ili u vezi sa službom zlostavlja podređenog ili mlađeg ili s njim postupna način kojim se vrijeđa ljudsko dostojanstvo, kaznit će se kaznom zatvora do tri godine.

(2) Vojni starješina koji počini krivično djelo iz stava (1) ovog člana prema više lica, kaznit će se kaznom zatvora do pet godina.

Podnošenje neistinitih prijava i izvještaja

Član 246 h.

(1) Vojno lice koje u obavljanju službene dužnosti ili službe podnese prijavu ili izvještaj neistinitog sadržaja, ili u prijavi ili izvještaju prešuti činjenicu koju nije smjelo prešutjeti, pa zbog toga prouzrokuje teške štetne posljedice za službu ili službu teško ugrozi i time dovede u opasnost život ljudi ili imovinu velike vrijednosti, kaznit će se novčanom kaznom ili kaznom zatvora do jedne godine.

(2) Ako je krivično djelo iz stava (1) ovog člana počinjeno podnošenjem izrazito važne prijave ili davanjem izvještaja izrazito važnog sadržaja ili su prouzrokovane izrazito štetne posljedice, počinitelj će se kazniti kaznom zatvora od šest mjeseci do pet godina.

(3) Ko počini krivično djelo iz stava (2) ovog člana iz nehata, kaznit će se novčanom kaznom ili kaznom zatvora do jedne godine.

Nepreduzimanje mjera za zaštitu vojne jedinice

Član 246 i.

(1) Vojni starješina koji ne preduzme propisane, naređene ili druge očigledno potrebne mjere za očuvanje života i zdravlja ljudi koji su mu povjereni, za osiguranje i održavanje u ispravnom stanju objekata, predmeta i sredstava koji služe borbenoj gotovosti, za uredno snabdijevanje jedinice koja mu je povjerena hranom, opremom ili materijalom, za očuvanje života i zdravlja stoke, ili mjere potrebne radi blagovremenog i urednog izvršenja radova osiguranja ili osiguranja objekata koji su mu povjereni, pa time prouzrokuje teške štetne posljedice za službu ili službu teško ugrozi ili dovede u opasnost život ljudi ili teško ugrozi zdravlje ljudi ili imovinu velike vrijednosti, kaznit će se kaznom zatvora od tri mjeseca do tri godine.

(2) Ako je krivičnim djelom iz stava (1) ovog člana neko lice teško tjelesno povrijeđeno ili je prouzrokovana imovinska šteta velikih razmjera ili druge teške posljedice, počinitelj će se kazniti kaznom zatvora od šest mjeseci do pet godina.

(3) Ako je krivičnim djelom iz stava (1) ovog člana prouzrokovana smrt jednog ili više lica, počinitelj će se kazniti kaznom zatvora od jedne do deset godina.

(4) Vojni starješina koji učini krivično djelo iz stava (1) ovog člana iz nehata, kaznit će se novčanom kaznom ili kaznom zatvora do jedne godine.

(5) Ako je krivičnim djelom iz stava (4) ovog člana prouzrokovana posljedica iz stava (2) ovog člana, počinitelj će se kazniti kaznom zatvora do tri godine.

(6) Ako je krivičnim djelom iz stava (4) ovog člana prouzrokovana posljedica iz stava (3) ovog člana, počinitelj će se kazniti kaznom zatvora do pet godina.

Neosiguranje na vojnim vježbama

Član 246 j.

(1) Vojno lice koje na vježbi, obuci ili u obavljanju pokusa ne preduzme propisane, naređene ili očigledno potrebne mjere osiguranja ili opreza, pa time dovede u opasnost život ljudi ili teško ugrozi zdravlje ljudi ili imovinu velike vrijednosti, kaznit će se kaznom zatvora od tri mjeseca do tri godine.

(2) Ako je krivičnim djelom iz stava (1) ovog člana neko lice teško tjelesno povrijeđeno ili je prouzrokovana imovinska šteta velikih razmjera ili druge teške posljedice, počinitelj će se kazniti kaznom zatvora od šest mjeseci do pet godina.

(3) Ako je krivičnim djelom iz stava (1) ovog člana prouzrokovana smrt jednog ili više lica, počinitelj će se kazniti kaznom zatvora od jedne do deset godina.

(4) Vojno lice koje počini krivično djelo iz stava (1) ovog člana iz nehata, kaznit će se novčanom kaznom ili kaznom zatvora do jedne godine.

(5) Ako je krivičnim djelom iz stava (4) ovog člana prouzrokovana posljedica iz stava (2) ovog člana, počinitelj će se kazniti kaznom zatvora do tri godine.

(6) Ako je krivičnim djelom iz stava (4) ovog člana prouzrokovana posljedica iz stava (3) ovog člana, počinitelj će se kazniti kaznom zatvora do pet godina.

Nepropisan ili nepažljiv odnos prema povjerenom oružju i vojnoj opremi

Član 246 k.

(1) Ko nepropisno ili nepažljivo drži, čuva ili rukuje oružjem ili vojnom opremom, koji su mu povjereni, a koji pripadaju vojnoj jedinici ili vojnoj ustanovi, pa time prouzrokuje njihovo oštećenje u većoj mjeri, uništenje ili nestanak, kaznit će se novčanom kaznom ili kaznom zatvora do jedne godine.

(2) Lice zaduženo za skladište borbenih sredstava, oružja ili vojne opreme, koje ne preduzme mjere s ciljem njihove zaštite ili održavanja, pa time prouzrokuje njihovo oštećenje u većoj mjeri, uništenje ili nestanak, kaznit će se kaznom zatvora od šest mjeseci do pet godina.

(3) Ako je krivičnim djelom iz stava (2) ovog člana prouzrokovana imovinska šteta u većoj mjeri, počinitelj će se kazniti kaznom zatvora od dvije do osam godina.

(4) Lice iz stava (2) ovog člana koje počini krivično djelo iz stava (2) ovog člana iz nehata, kaznit će se novčanom kaznom ili kaznom zatvora do tri godine.

(5) Ako je krivičnim djelom iz stava (4) ovog člana prouzrokovana posljedica iz stava (3) ovog člana, počinitelj će se kazniti kaznom zatvora od tri mjeseca do tri godine.

Protuzakonito raspolaganje povjerenim oružjem ili vojnom opremom

Član 246 l.

Ko protuzakonito prisvoji, otuđi, založi, preda drugome na upotrebu, ošteti ili uništi oružje ili vojnu opremu koji su mu povjereni a služe potrebama odbrane, kaznit će se kaznom zatvora od šest mjeseci do pet godina.

Krađa oružja i vojne opreme

Član 246 m.

(1) Ko otuđi oružje ili vojnu opremu ili dio borbenih sredstava koji služe potrebama odbrane, s ciljem da njihovim prisvajanjem pribavi sebi ili drugome protupravnu materijalnu korist, kaznit će se kaznom zatvora od šest mjeseci do pet godina.

(2) Kaznom zatvora od jedne do deset godina kaznit će se ko krivično djelo iz stava (1) ovog člana učini:

- a) obijanjem, provaljivanjem ili drugim svladavanjem većih prepreka da dođe do stvari iz zatvorene zgrade, sobe, blagajne, ormara, sefa ili druge zatvorene prostorije ili prostora; ili
- b) kao pripadnik grupe ljudi koji su se udružili radi činjenja krađe; ili
- c) na naročito opasan ili drzak način; ili
- d) nošenjem oružja ili opasnog oruđa za napad ili odbranu; ili
- e) iskorištavanjem stanja nastalog požarom, poplavom, zemljotresom ili drugom sličnom nesrećom; ili
- f) u odnosu na stvar velike vrijednosti a počinitelj postupka s ciljem pribavljanja imovinske koristi takve vrijednosti.

Nedopušteni ulazak u vojna postrojenja i neovlašteno pravljenje skica i crteža vojnih postrojenja ili borbenih sredstava

Član 246 n.

(1) Ko s ciljem izvidanja neovlašteno uđe u vojna postrojenja iako zna da je pristup zabranjen, kaznit će se novčanom kaznom ili kaznom zatvora do jedne godine.

(2) Ko neovlašteno pravi skice ili crteže ili fotografira vojna postrojenja ili borbena sredstva ili ih na drugi način snima, kaznit će se kaznom zatvora od tri mjeseca do tri godine.

Samovoljno udaljenje i bijeg iz vojne jedinice ili službe

Član 246 o.

(1) Vojno lice koje samovoljno napusti svoju jedinicu ili službu i ne vrati se na dužnost u roku od deset dana, ili se u istom roku ne vrati na dužnost s dozvoljenog odsustva izvan jedinice ili službe, kaznit će se novčanom kaznom ili kaznom zatvora do jedne godine.

(2) Kaznom iz stava (1) ovog člana kaznit će se vojno lice koje više od dva puta u periodu kraćem od deset dana bez dopuštenja ostane izvan svoje jedinice ili službe, kao i vojno lice koje samovoljno napusti svoju jedinicu ili službu za vrijeme izvršenja važnog zadatka ili povećanog stepena borbene gotovosti jedinice.

(3) Vojno lice koje se krije s ciljem izbjegavanja službe u Oružanim snagama Bosne i Hercegovine ili koje samovoljno napusti svoju jedinicu ili službu i ne vrati se na dužnost u roku od trideset dana ili se u istom roku ne vrati na dužnost s dozvoljenog odsustva izvan jedinice ili službe, kaznit će se kaznom zatvora od šest mjeseci do pet godina.

(4) Vojno lice koje napusti zemlju ili ostane izvan zemlje s ciljem izbjegavanja službe u Oružanim snagama Bosne i Hercegovine, kaznit će se kaznom zatvora najmanje tri godine.

(5) Vojno lice koje se priprema pobjeći izvan zemlje s ciljem izbjegavanja službe u Oružanim snagama Bosne i Hercegovine, kaznit će se kaznom zatvora od tri mjeseca do tri godine.

(6) Počinilac krivičnog djela iz stava (1) ovog člana koji se dobrovoljno javi nadležnom organu može se blaže kazniti ili osloboditi kazne.

(7) Počinilac krivičnog djela iz st. (3) i (4) ovog člana koji se dobrovoljno javi nadležnom organu može se blaže kazniti.

Kažnjavanje za krivična djela počinjena za vrijeme ratnog stanja ili vanrednog stanja ili kad je izdato naređenje za angažiranje i upotrebu Oružanih snaga Bosne i Hercegovine

Član 246 p.

(1) Ko počini krivično djelo iz člana 246 a. (*Neizvršenje i odbijanje izvršenja naređenja*), stava (2); člana 246 b. (*Odbijanje primanja i upotrebe oružja*); člana 246 c. (*Protivljenje nadređenom*), stava (1); člana 246 d. (*Povreda stražarske, čuvarske, patrolne ili druge slične službe*), st. (1), (2) i (5); člana 246 e. (*Prinuda prema vojnom licu u obavljanju službene dužnosti*), st. (1) i (2); člana 246 f. (*Napad na vojno lice u obavljanju službe*) st. (1) i (2); člana 246 g. (*Zlostavljanje podređenog ili mlađeg*); člana 246 h. (*Podnošenje neistinitih prijava i izvještaja*); člana 246 i. (*Nepreduzimanje mjera za zaštitu vojne jedinice*), st. (1), (4), (5) i (6); člana 246 j. (*Neosiguranje na vojnim vježbama*), st. (1), (4), (5) i (6); člana 246 k. (*Nepropisan ili nepažljiv odnos prema povjerenom oružju i vojnoj opremi*), st. (1), (4) i (5); člana 246 n. (*Nedopušteni ulazak u vojna postrojenja i neovlašteno pravljenje skica i crteža vojnih postrojenja ili borbenih sredstava*) i člana 246 o. (*Samovoljno udaljenje i bijeg iz vojne jedinice ili službe*), st. (1) i (2) ovog zakona, za vrijeme ratnog stanja ili vanrednog stanja ili kad je izdato naređenje za angažiranje i upotrebu Oružanih snaga Bosne i Hercegovine, kaznit će se kaznom zatvora od jedne do deset godina.

(2) Ko počini krivično djelo iz člana 246 d. st. (3) i (6); člana 246 e. stava (3); člana 246 f. stava (3); člana 246 i. st. (2) i (3); člana 246 j. st. (2) i (3); člana 246 k. st. (2) i (3); člana 246 l. (*Protuzakonito raspolaganje povjerenim oružjem ili vojnom opremom*); člana 246 m. (*Krađa oružja i vojne opreme*), stava (1) i člana 246 o. st. (3) i (5) ovog zakona, za vrijeme ratnog stanja ili vanrednog stanja ili kad je izdato naređenje za angažiranje i upotrebu Oružanih snaga Bosne i Hercegovine, kaznit će se kaznom zatvora najmanje tri godine.

(3) Ko počini krivično djelo iz člana 246 a. st. (1) i (3); člana 246 b. stava (1); člana 246 c. st. (2), (3) i (4); člana 246 d. stava (4); člana 246 f. stava (4); člana 246 m. stava (2) i člana 246 o. stava (4) ovog zakona, za vrijeme ratnog stanja ili vanrednog stanja ili kad je izdato naređenje za angažiranje i upotrebu Oružanih snaga Bosne i Hercegovine, kaznit će se kaznom zatvora najmanje pet godina ili kaznom dugotrajnog zatvora.

Prelazak i predaja neprijatelju

Član 246 r.

(1) Vojno lice koje se za vrijeme ratnog stanja ili vanrednog stanja ili kad je izdato naređenje za angažiranje i upotrebu Oružanih snaga Bosne i Hercegovine pridruži neprijateljskoj vojsci, kaznit će se kaznom zatvora najmanje pet godina.

(2) Vojno lice koje se za vrijeme ratnog stanja ili vanrednog stanja ili kad je izdato naređenje za angažiranje i upotrebu Oružanih snaga Bosne i Hercegovine preda neprijatelju prije nego što su iscrpljena sva sredstva i načini odbrane, kaznit će se kaznom zatvora od jedne do deset godina.

Neispunjenje dužnosti za vrijeme borbe

Član 246 s.

(1) Vojno lice koje za vrijeme borbe ili neposredno pred borbu ne izvrši svoju dužnost, pa time prouzrokuje štetne posljedice za vojnu jedinicu, sigurnosnu operaciju ili za borbenu situaciju, kaznit će se kaznom zatvora od jedne do deset godina.

(2) Ako su krivičnim djelom iz stava (1) ovog člana prouzrokovane naročito teške posljedice, počinitelj će se kazniti kaznom zatvora od pet do petnaest godina.

Napuštanje dužnosti za vrijeme borbe bez dopuštenja

Član 246 t.

(1) Vojno lice koje za vrijeme borbe ili neposredno pred borbu bez dopuštenja napusti svoju dužnost, kaznit će se kaznom zatvora od jedne do deset godina.

(2) Ako su krivičnim djelom iz stava (1) ovog člana prouzrokovane naročito teške posljedice, počinitelj će se kazniti kaznom zatvora od pet do petnaest godina.

Napuštanje položaja protivno naređenju

Član 246 u.

(1) Vojni starješina koji protivno naređenju napusti položaj sa jedinicom koja mu je povjerena prije nego što je iscrpio sva sredstva odbrane, kaznit će se kaznom zatvora od jedne do deset godina.

(2) Ako su krivičnim djelom iz stava (1) ovog člana prouzrokovane naročito teške posljedice, počinitelj će se kazniti kaznom zatvora od pet do petnaest godina.

Napuštanje oštećenog plovila ili aviona prije vremena

Član 246 v.

(1) Komandant borbenog plovila koji, za vrijeme ratnog stanja ili neposredne ratne opasnosti ili tokom vanrednog stanja ili kad je izdato naređenje za angažiranje i upotrebu Oružanih snaga Bosne i Hercegovine, napusti oštećeno plovilo prije nego što je izvršio svoju dužnost po propisima o službi na plovilima, kaznit će se kaznom zatvora od jedne do deset godina.

(2) Član posade borbenog plovila koji, za vrijeme ratnog stanja ili neposredne ratne opasnosti ili za vrijeme vanrednog stanja ili kad je izdato naređenje za angažiranje i upotrebu Oružanih snaga Bosne i Hercegovine, napusti oštećeno plovilo prije nego što je komandant plovila izdao naređenje za napuštanje, ili član posade vojnog aviona koji za vrijeme rata napusti oštećeni vojni avion, kaznit će se kaznom zatvora od jedne do osam godina.

(3) Ako su krivičnim djelom iz st. (1) i (2) ovog člana prouzrokovane naročito teške posljedice, počinitelj će se kazniti:

- a) za krivično djelo iz stava (1) ovog člana, kaznom zatvora od pet do petnaest godina;
- b) za krivično djelo iz stava (2) ovog člana, kaznom zatvora od dvije do deset godina.

Ostavljanje neprijatelju neoštećenih borbenih sredstava

Član 246 z.

(1) Vojno lice koje dopusti da neprijatelju padne u ruke bitno neoštećeno vojno skladište, plovilo, avion, tenk ili drugo borbeno sredstvo, kaznit će se kaznom zatvora od jedne do deset godina.

- (2) Kaznom iz stava (1) ovog člana kaznit će se i ko protivno naređenju dopusti da neprijatelju padnu u ruke bitno neoštećena postrojenja ili drugi objekti od velikog značaja za odbranu države.
- (3) Ko počini krivično djelo iz st. (1) i (2) ovog člana iz nehata, kaznit će se kaznom zatvora do tri godine.

Slabljenje borbene gotovosti i borbene situacije

Član 246 q.

- (1) Ko u toku borbe ili neposredno pred borbu oslabi borbenu gotovost u jedinici ili nanese štetu borbenoj situaciji, izazivanjem nezadovoljstva među vojnicima, širenjem uznemirujućih vijesti, bježanjem, bacanjem oružja ili municije ili širenjem straha ili na drugi način, kaznit će se kaznom zatvora od dvije do dvanaest godina.
- (2) Vojni starješina koji ne preduzme potrebne mjere prema podređenom ili vojnom licu nižeg čina koji za vrijeme borbe ili neposredno pred borbu slabi borbenu gotovost jedinice ili nanosi štetu borbenoj situaciji širenjem uznemirujućih vijesti, stvaranjem nereda i zabune u jedinici, ili na drugi način, kaznit će se kaznom zatvora od jedne do pet godina.
- (3) Ako su krivičnim djelom iz st. (1) i (2) ovog člana prouzrokovane naročito teške posljedice, počinitelac će se kazniti kaznom zatvora najmanje pet godina.

Neosiguranje vojne jedinice

Član 246 x.

- (1) Vojno lice koje za vrijeme ratnog stanja ili vanrednog stanja ili kad je izdato naređenje za angažiranje i upotrebu Oružanih snaga Bosne i Hercegovine propusti da osigura jedinicu koja mu je povjerena, pa time prouzrokuje teške posljedice za jedinicu, kaznit će se kaznom zatvora od dvije do dvanaest godina.
- (2) Ako su krivičnim djelom iz stava (1) ovog člana prouzrokovane naročito teške posljedice za jedinicu, počinitelac će se kazniti kaznom zatvora od pet do petnaest godina.
- (3) Vojno lice koje počini krivično djelo iz stava (1) ovog člana iz nehata, kaznit će se kaznom zatvora od tri mjeseca do tri godine.
- (4) Ako je krivičnim djelom iz stava (3) ovog člana prouzrokovana posljedica iz stava (2) ovog člana, počinitelac će se kazniti kaznom zatvora od šest mjeseci do pet godina.

Neizvještavanje vojnih organa

Član 246 y.

- (1) Ko za vrijeme ratnog stanja ili vanrednog stanja ili kad je izdato naređenje za angažiranje i upotrebu Oružanih snaga Bosne i Hercegovine ne izvijesti nadređenog, starijeg ili komandu o događaju koji očigledno zahtijeva neodložno preduzimanje vojnih mjera, kaznit će se kaznom zatvora do dvije godine.
- (2) Ako su krivičnim djelom iz stava (1) ovog člana prouzrokovane teške posljedice, počinitelac će se kazniti kaznom zatvora od jedne do osam godina.

Izricanje disciplinske kazne ili disciplinske mjere

Član 246 w.

Za krivično djelo protiv Oružanih snaga Bosne i Hercegovine iz ove glave ovog zakona s propisanom

kaznom zatvora do tri godine, vojnom licu može se umjesto krivičnopravne sankcije izreći disciplinska kazna ili disciplinska mjera utvrđena propisima kojima se uređuje disciplinska odgovornost u Oružanim snagama Bosne i Hercegovine, ako je djelo naročito lakog oblika i ako to zahtijevaju interesi službe.

Odgovornost za krivično djelo učinjeno po naređenju nadređenog

Član 246 ww.

Nema krivičnog djela ako njegova zakonska obilježja ostvari podređeni po naređenju nadređenog, a to naređenje dato je u okviru službene dužnosti, osim ako se naređenje odnosi na činjenje genocida, ratnog zločina, zločina protiv čovječnosti ili drugog krivičnog djela za koje se može izreći kazna zatvora deset godina ili teža kazna, ili ako je očigledno da se izvršenjem naređenja čini krivično djelo."

Član 9.

Zakonodavni organi entiteta će svoje krivične zakone uskladiti s ovim zakonom u roku od mjesec dana od dana stupanja na snagu ovog zakona.

Član 10.

Ovaj Zakon stupa na snagu osmog dana od dana objavljivanja u "Službenom glasniku BiH".

PSBiH broj 309/06
23. maja 2006. godine
Sarajevo

Predsjedavajući
Predstavničkog doma
Parlamentarne skupštine BiH
Martin Raguž, s. r.

Predsjedavajući
Doma naroda
Parlamentarne skupštine BiH
Mustafa Pamuk, s. r.